



## Tho Inla La Pathian Ko In

**Damna Aw ngaina simtute zosia kumthak chibai!**

Hun leh nite hung kihei liamjel in, lemguattu chung Pathian jal in kumthak 2020 mel mukit thei ah i um tak ziak un kumkhat tha liam leh kumkhat dang ei pui galkaitu Lalpa chuh lopina changta hen! Khawvel ah mihing in i mamaw ma ma, i nei khak nailo thilthak piak ah i um phat ua leh i kipak ma ma gual un, kumthak i mu khak nailo uh piak ah i hung um ua, ikipak ma ma jinglai ua hin, lunggil ah hung kilang khat chuh, zia kum hih banggual kum ahung hi diam tihi ngaitualo theilo chuh ahi.

Gingtu hinkhua hih Lalpa tawh kitawn jinglo ah kalsuan thei ihilo ziak un i zui khak nailona uh lampi ihun zuito jelnad ing ua lamjang tak leh huitung taka i galkai kittheina ding un ***'Tho inla La Pathian Ko In'*** ti thupiak hi tuni hin ei uh a ding inle a pawimaw pen khat chuh ahi. Pathian in Jonah kiang ah thu apiak chuh Ninevie khawpi sung ah mite chung ah siatna huaisetak hungtung ding ahi thu a hiatsak hih ahi. Maleh Pathian sawlna leh a thupiakte ngaisaklo ah ama dawitelna lam ah a jam mangsan jia in 'Tho Inla La Pathian Ko In' ti kona huaise tak hi a chung ah hungtung khawlaw ahi.

Lalpa eikona gual ah umlo ah, Lalpan ei ngansiana dungjui ah i chung ah kinga mawpuakna ngaisaklo ah khawvel thil en ah mani dawitelna dungjui ah i chiato zel ua ahi chun, Jonah jia a Lawng sung ah um zosian tuifawn kinawk nasatak jia a Lawng siatna hungtung ding lau um tak kal ah thi lau um ah a um uh kha ngaitua hitiu.

I pawlpi sung ah Lalgam nasepna'n malam a sawnjel ahi tia ikipak ma ma jinglai in nang ziaka ipawlpi kuang tawh hih tuifawn kinawk lak ah tummmang ziangthei ding ahi chun, 'Tho Inla La Pathian Ko in'. Nangma ziaka la ko chuam

uh khawvel sualna tuifawn laka tum vang vang ta, a sung ah chuang mipiten Lawng damna ding leh sukjang khaina ding ngaituana'n a thilneiteu le itchalo ah tuili lai ah seplut zota, nang a sung ah nuam taka ipmu nalai la hi chun tuni hin "Tho Inla La Pathian Ko In' Nangma ziaka la Khristian insung ahi ding gual taka ding zotalo ah Pathian lopina le kilang daw k zotalo ahi chun tuni hin Tho Inla La Pathian La Ko Ding Ahi.

Jonah in Pathian ma ah sukkhial nasatak a nei ziaka a chuanna Lawng ah a chuan khawmpite a ding a manthaina huaisetak a tut ziaka hin awimaw a um ma ma jinglai in, a chanchin a ban isim suk leh a ettawn tak ma ma na umkit chuh, sukkhialna imlo ah a chuanna Lawng leh a chuan khawmpite damna dinga ama a kipiakdawna cha hih ahi. ***"Hebrai mi kahin, Lalpa Van Pathian, Tuisuagiat leh khawmual siampa ho mi ka hin, Ama ah kipat jammang gua ka hin, keima ziaka ziagual thil hih tuak la hui in, ziaziakachun,***

***ei dawmdawk unla, tuisuagiat sunga ei septhaleu chun, tuisuagiat chuh nang uh a ding in hung thip tan ah"***

Awleh Unau! la sukkhialna selmangna dinga a huai-sezaw sukkhial kit thei ahi ti hih hejing in, bukimlona khawvel ahin bukimlo ah siam i hiziak un mihing in sukkhial, bawlkhial nei thei leh um thei sek ma ahih, maleh Jonah gual ahin, la hina ki imlo in "Tho Inla La Pathian Ko in" chutileh, nangma zia in la insung, la kochuam sung, pawlpi sung ah lalgam nasepna'n siatlam manaw jing hih sukdam ah hung um thei ding ahi. Zia na chuh sem ding in Lalpan ei daw ah, ziaziakachuh kumthak dang khat ei piak be kit le himawlo ding ahi.

Lalpan simtu zosia mlzawl chiatta hen!

--o0o--

# KUMTHAK THUPUKNATE (NEW YEAR RESOLUTIONS)

~By: Revd. S.T.Kaia Vaiphei

*“Kuale Krista ah um chun, thil siam thak a hung hita; thil luite chu a bei ta; ngai tia thil zosia chu a hung thak tai” (II Korinthte 5:17).*

## **A** masapen in simtute zosia kumthak chibai !

Kum 2019 a ding ah ni nunungpen chu a hung tung ta. A thiam ding in a lian a neu, a hau a jawng, a ching a thiam leh mimawlte kumthak mat dan chuam chuam ah mang ding in i kisa buai ma ma tau ahi. Mi khenkhat in Biakin sung ah Kumlui thiam ding ah programme nuam tak leh khe-la tak mai ah a mat zing lai un khenkhatte chu zat chuam dai in zu leh sa ah nunnawp bawl pum ah tha ding ah um le um in au.

Hun leh ni leh tha leh kumte hung kihei in kum 2019 ni nunungpen nisa chu kum 2020 ah ni masapen ah hung kilang kit ding in a mual liam ta ahi. Hun leh dakkal chia jel in jan pung 11.30 vel a hung gi ta, mi tamtakte chu Mid-Night service mang ding in Biakin lam juan in a chia jung jung lai un khenkhatte chu zu mun-

sa mun a Mid- Night service mang gua le um ngei in au. Zan pung 12 zawh in Kumthak chu a hung kipan ngal ta, kumlui chu a mual liam tai. Ahin la I bawlphat leh I bawl siatte chu mualliam thei lo in tepte in um zing ta ding ahi. I bawl phatteu tepte ah um vang a khawkna a um pua, himaleh I thil bawl phatlote leh I gitlonate haw le tepte ah um zing ahi ti I het uh a pawimawi. Kumlui in ei beisan gual ah bei lo ahi. Ziaziakchun I gitlonateu tepte a um lo ah I thil pha bawlteu ngen tepte ah a um theina ding in Kumthak thupukna siam a pawimaw ma mai.

Sawlchak Paul chun Philipi Kochuamte kiang in, “Bang hileh le, la umdan uh chu Krista Chanchin pha tawh kituak phawt mai hen ...” atia (Philipite1:27a). Unau, tuhun ah Krista Chanchinpha tawh

kilawm lo a la het la thilchin, la tawidan, la um dan, la paudan leh a dang dang te kum hung thak ding 2020 ah la lutpi nuamlote a ban in zikdawk in la, haltum in ahiloleh paimang in la, bawl kit talo ding in kila'n in chutileh Lalpa hatna suang in zo ngei ding la hi. Etsaknan: - Zu dawn tak lo ding, Biakin kai zing ding leh a dang dang. Zia la zik thak te haw chu la zing theina ding mun khat in tak le chin la bawl kit khak na a um in le hun hetdawk sak jel in tin haisan thei ding la hi. Zialochun le, Pathian malsawmna kum chia sa ah la chante sulang / zik lang in la, Lalpa kiang in kipakthugen in. Lalpa'n Kumthak 2020 a hun musak ta, Ama a ding in bang bang la sem in bang gual hinkhua mang ding in la kilan diam?

### **Kumthak Ni masapen mel I mu tau. Kumthak Chibai!**

Kumthak ni masapen hi phalbi vuk kiak lai ah zingkal matak a vuk ketha, nisa hung eng dawk sing seng in a hun khaw khak a vam sing seng tawbang ahi. Kuaman a va tawkhak lo, bangma'n a suk buak lo thi-ang sit set ahi. Zia vuk vam

chung chu I tawh ahiloleh i sukkhak ahi chun i sukkhak dan dan in a hung kilang sek ahi. Zia gual a chun nanging le ni 365 vuk gual a vam sing seng bangma chan a sukbuak kei lo, a sukninlo hial la nei a, nang a neitu'n la bawl dan dan leh la hi ta phawt chu hung kilang mai ding ahi. La bawl phat chun, la thilpha bawlte tepte leh suklat in hung um in tin, la bawl siat chun la bawl siatte chun tepte in um mai ding ahi.

Zia lo chun le Kumthak kiti hi lehkhabu zik lo, zik pawl khak nailo mawng mawng vam sik set pek 365 nei tawbang la hi. Pek khat chu ni khat jel gual in gel le chin, pek 365 a awng zik nailo la nei hi. La nungchhang, la thilbawl, la nasep, la kampau, la tawina zosia bukim tak in zia pek 365 sung ah chun hung kilang mai ding ahi. Tunin, Pathian in Kumthak nikhatna a hun mu sak ta, lehkhabu ziklo a chun bang la zik pan ta diam le? La zik dan dan chu tepte in hung um in tin kumtawp in hung kilang vek ding ahi. Kumtawp leh la thil zik zosia chu mitin muthei ding in TV gual ah et thei ding in suklat

ding hitaleh mi zosia mu ding ah la phal lo mungam lo ding la zik a um kha diam? Thil zachat um tak tak a hung kilang kha diam? Nang ngei in le la mungam lo leh la et ngam lo ding a hung kilang kha tawl diam?

### **Kumthak Thupukna Bang La bawl Diam?**

Tuni hin Lalpa'n nang leh kei I thep ziak, I phat ziak leh I sep phat ziak hilo in Kumthak bangtik ah le I chan khak lo uh leh i mu khak lo uh ei mu sak ta, bang bang thupukna la siam diam? Mi khenkhatte get chun la, "Kumthak thupukna kisiam lehle bangma kizodiak puan a, phachuam puan a" ti in thupukna siam lo in a um ui. Patep masa lo ah 'zo puang ka' ti mai chu mi dawilawk leh tupna nei lo kisuak ahi. Mi khenkhatten Kumthak thupukna ka neilai ah, "Nahzial chep tak lo ding" ahiloleh "Kuva thai tak lo ding" ti ah ka kitiamna tuchan hin ka bawl kit ta puai' a tiu a, kipak-pi a um hi. Zaw ding leh zawlo ding thu hilo in bawl him him in kisik puan la. Lalpa hatna jal in jo ding la hi. Kum dang ah la bawl khak nailo leh le tukum bek in a la bawl in. Thupukna

kitup tak la bawl a, la bawl jui a, la chiana lam zosia Lalpa la dawt zing ahi chun Ama'n lam-dang tak in kum tung in hun mapui in tin, malsawmna leh lawtinna hun pian tin, chu leh la lampi ding chu siam zan piak ding ahi. Khaile unau tunin Lalpa hatna suang in tukum thak a hin bang bang thupukna la siam thei diam? *Etsakna'n:*

1. Bible sim suak ing ka.
2. Khamthei him him haisan tang ka.
3. Zua gen haisan tang ka.
4. Le'p guk haisan tang ka.
5. Nasep habawl jaw diak ka.
6. Lalpa dingin a tam thei pen sep guang ka.
7. Tukum in sepna mu gaw tei tei ing ka.
8. Ka zilna lam a lawtinna sang tak mu guang ka
9. Pauchapna habawl zaw diak ing ka
10. Biakin kikhawp thul puang ka,
11. Zia etsakna ding a kisu-langte ti lo in nang in thupukna la kingam dan dan in la siam thei ahi.

Mi tamtak in thupukna i siam sek ua zo lo in I um sek a, a ziak chu I thupuknateu I het

jui sek lo ziaak uh ahi. Ziaziakchun la thupukna siam te chu la mu zing theina ding mun pen in ta'k in la, kawi leh chun mu zing in la tin, hun hetdaw sak zing in tin, bawl zing thei ding la hi. Lalpa'n Kumthak Thupukna Ama hatna suang ah la siam te zo thei ngei ding in la ma pui hen la, kumtung in vangphatna leh lawtinna ngen in hun del zui zing ta hen, Amen.

--o0o--

**Suak hilo dingin Christa chun ei thadok tai;  
ziaziakchun, dingdet unla, suak ngawngkol in  
tangkit takiu in. (Gal 5;1),**

*~Pr. James Th. Minlun Vaiphei*

*"Thutak chu hia'n latiu in thutak chun suak a kipat in zalenna hun pia ding ahi." (John 8;32)*

Saltan kiti hi gualla ziaak ah tanna aum ah, hunmat thiamlo ziaak ah tanna le aum ah, sum le pai matdan thiamlo ziaak tanna, zalen takluat ziaak ah zalenna sal ah tanna le aum kit hi. Zia te lak ahin ah akhawk pen chu zalen na sal ah tan khak hi ahi.

Hinna nei zosia Mihing, Ganhing, Sa leh Nga, Thing leh Gua ziang inle zalenna I dawi chiat ah, I pawu maw baww ahi. Zalenna umlo in bangma tha-tho tak ah bawl ahaksa khandona le aum theipuai. Zalenna hin mi asu thanuam in lunglutna eipia neitu chan na leh kinei sakna eipiai, mat khial abailam mama ah, pha mama hileh kilawm a mang diklote a ding ah manthaina, kisikna leh

vangsiatna ahi. Thilzosia atak leh alem aum gual in Zalen na hile atak leh alem aumkit hi. (Alem itichu akibatpi maleh atak tak hilo tina ahi),amin ah zalen hingal zalenna taktak hilo taksa, thagau, lungthim ah saltang umthei ahi. Anuai ahin zalen na nei nung ah sal ah I tan khah theinau teu vak en hitiu:

**(1) SAKHUA SAL AH TANG:**

Zalenna gam lianpen  
(The biggest democratic coun-

try) ti kihia I gam India hi hunkhat lai in British te khut nuai ah suak leh sal in ila tang ahikha. Sakhua lam ah le kulmut mama ila hui ah I gam ading ah hiat thei ding sakhua lianpen chu Hindu ahia aban in Muslim ahi kit hi. British ten sakhuami talua ihui eihiat ziaak un Hindu te leh Muslim te hi kitattua leh amau chung hin vai aki hawm thei ina ti in, a Pathian biakdan uh/asakhuama mi dan uh lemchang ah mang in Hindu te kiang in Hindu sakhua hawidan leh phatdan nasatak ah gen (fakdel)in Hindu sakhua longal kingakna thei aumlodan gen in ziaabep chu hilo in Hindu hi sakhua dang gual mai hilo nam thiangtho ahidan uh nasatak ah hil in. Amau sakhua kiletsakpi tak ah aumlai un, alangkhat lam ah Muslimte kiang in zia gual ma chun Muslim sakhua hawidan leh phat dan te namthiangtho ahidan teu nasatak in ahil kit ua midang sakhua chu bangma ngai lo ah kisathei tak in aumkit uh ahi. Chutia alang tua ah sakhua dik leh thiangtho, hat bawlthei kisa gel ah a umlai tak un Muslimte Pathian biakna (Mosque)ah Vok luchang avase-

plut ua, Hindute Pathian biakna (Temple) ah Bawng luchang ava seplut kit ua, tichun khua helo Sakhua dik leh thiangtho kisa mama Hindu te leh Muslim te kikal in kihiat thiam lona nasatak ahung um in, kimusit ziaak ah thil kibawl dan ah ngai in, kidona nasatak ahung um ah, mitamtak in ahinnau ahun chan tau ahi. Tichun sakhua ziaak in kitha kimat nasatak hungum in akitha akimat kal un British te khut nuai ah atang del mai uh ahi. India in 15 Aug. 1947 in za lenna ala muta maleu tuni tiang in Hindu leh Muslim kal in sakhua ziaak ah kihiat thiamlona /kimudana sal ah tang in, zalenna tak taka um thei talo in akawltan nau apat pawtdawk thei talo bangzat ahem aum zing ahi. . Ziaziak chun Tuni tiang in Hindu leh Muslim kikal in kihiat thiamna tak taka um thei talo in “UI leh KEL” abang den uh ahi.

Tulai I gam ah gingtu te lak inle christa'n zallenna eipiaking ah pawl leh pawl kikal ah kihiat thiam lona kei uh nang uh kitina sal ah tang ihi khak ding lau aum mama hi. Kochuam boundary alian thei mama

ah, Gingtu Christian kiti chiat te kal in le pawl zaak ah kihiat thiamlo na sal ah tangah pawt thei tak tak talo mi bang zat I um diam? kinagidam thei lo “UI leh KEL” bang mai gingtute lak ah I um khak di lau um tak ahi. I Lal jesu thutan ding ah ahung phat leh apawl in ei hung kopuan tin mitin in ama chawn dan chiat puang ding ahingal ua, I tam leh tawm (society) in ei en puan tin I ginna leh mitin ama chawna dung zui in vai hawm zawna (not quantity but quality) Tekhina :Tuilo I nei ah ziatak ah chun changkuang alian deu, aneudeu, achawmdeu asaudeu aum hi achangkuang I dawzi zaak ah lonei ihipua a sung ah Bu umte kigual tak ah tui achan theina ding leh akhan uh aki gual thei nading in alem thei dan dan in kituptak changkuang I bawl sek ahi. Lolai ah bute ahung pitin phat leh changkuang chu umzing maleh gal apat I et leh changkuang kimu talo in Bu hing dipdep akimu sek ahi. A changkuang dawkwel vul ziang chun eisu kipak puntin a Bu hing dipdep zawk chun eisu kipak zawna. Zia gual ma in Lalpa Grep huan

sung I kochuam sung hi Biak in let zaak, ahausak zaak, mitam zaak in Lalpa kipak puan tin thagau ah I hin leh I hinlo igasua leh gasualo in kipak zawna. tu hin Lalpa mitmu in ihingdep dep diam ahiloleh changkuang bep mudi'n ium khadiam . Pawl chuam umlo ding Katina ahipua maleh Gingtu te kipawl khawm na pawl hi iki dekna ding ahipua, asung ah umte kitup tak ah iki etkawl ah thagau lam ah hing dipdep ah ium na ding zawk ahi. ,Kochuam hi kibangchiat puan tin thagau ah ga isua khawm theina ding ah pawl umzaw ahi.

## (2) ZALENNA SAL AH TANG.

.....zalen tak in um un himaleh la zalennau chu diklo bawlnan a lemchang in mang kiu in. (1pet 2;16 Gal 5;13) Thil lamdang mama khat chu zallenna suak ah tan hi ahi. Mihausak khat hin suak pa khat anei ah asuakpa min chu John ahi. John chu gimthei akisa mama sek ah nikhat chu gimthei kisak zaak in amu amang a su sia lungna tak ah aki tawmlai ap un avamu John bangti lahem? bang lungnatna nei lahem ti adawt le



John in tuni nang suak ah kapan zia hi kei chatvai zia leh gin imlo ziale hilo, Eden huan ah Eve leh Adam in nek lodi theiga alanekzia ah kei kagen-thei khawlaw ahi.khutilo hileh tuni nang leh kei kiki bang ding zalen tak ah umding kahi atia. Apun a lungsia bawi tuni kipat nang kasuak lahitapua, kachapa lahitai. Insung ah kanei zosia nang a ahita, suakna sem hitapuan latin na lasep lele nang a sem hizaw ta'na ahin la zia no sungah kathil kawi hi la en thei ah la khawi thei ah himaleh la hawnlo hial di ahi. Lahawn ninileh kacha hipuan latin suakna sem kit tadi lahi ati piak hi. Tichun nidang banglo in apun le ahepi mama ta insung ah thil le law aum zosia ama a ahiphat in nuam asa mama ah zalen tak in bang khawi in bang ne le le kuaman bangma agen tapua anawp le asem ah anawpni le asempua a zalen mama hi. Tichun hun bang chan ahem aum nung in apu chu khualzin ding in achia achiakal in asuakpa chun kapun thil zosia chung ah thuneina eipia bang ati leh zia no hi kei ading ah phallo ahidiam ti in zia no sung ah

bang bep um ahidiam ti lungthek ten in ava en sek ah akhawi sek ah khawidi phal etdi phal hawndi bang ding ah phallo ahidia aw?ti'n lung thim nuamlo tak in akingai tua ah kapu mulo kal in vak ki en le bang bep um ahidiam a mulo kal in kikawi kittan na atia zia no chu ahon leh no sung ah chun bang ma thil thupitak umlo in "khu-aiva" khat aum ah avak hawn leh "khuaiava" chu aleng mang ta, khuaiava dang man ding in achia ah abuai mama lai in apu ahung tung ah John bawlo di kati chu labawl ahitai maw? Nidang in Eve leh Adam sukkhial zia in kasuak lahia, tuni kipat nang suk khial zia ah kasuak ah um kit tading lahi ati piak hi. Ziapa gual ah zalenna mat diklo zia ah siam phat thei taklo kawlah tang mi bang zat ium diam ti hi ngaitua kham ahi. Kawlah itanna tamtak hi I zalen na I man thiamlo zia ah tang ihi sek hi. Chapa taimang pa le apa kiang ah a umlai in haksatna atuak akigen ngaipua zalenna amu ah apa apat ah ataimang nung, azalenna nung in haksatna atuak ahikha. Zalenna amu nung in kipak mama le kilawm

ahia, kua kipak malak in a zalen nan sal in apuilut ah genthei na tawp khawk atuak ahi. A zalen na amat thiamlo ziak in. zalen-na hin tawp in tai anei pua, zalen na dawu tapo chun zalenna amang khial sek uh ahi.

### (3) THANHUAINA SAL AH TANG.

Thagtatna I tihi numei leh pawsal kal ah thangtatna Pathian mit mu ah thet umpen chu ahi. Zia chu Tulai I gualla naupen te lak ah khat chu ahi, Sodom leh Gomorrah gual in thang tatna sal ah atang kitol dawu theilo buai muding tampi a I gam ah um hi. nungak tangval kal ah, minu leh mipa kikal ah kingaina thi-anglo apung mama ahi. Mipa leh nungak kingai, minu leh tangval kingai, mi pawsal tawh kingaizawng minu, mizi tawh kingaizawng mipa, nupan his-amlo nupan hinkhua mang ah numei pawsal hina thangtak ah mang mai. Thil diklo leh phalo ahi ti le hiatho himaleh hai thei lo sal ah tang kha bangzat ahem katuak khata ahi. nidang sang ah tulai numei leh pawsal kal ah thangtat na a nasat mama na hi a ziak tampi gen ding um maleh

aziak lianpen khat chu khawvel changkan na mobile leh computer internet hung um ziak ahi iti lotheilo ahi. Aziak chu nidang ah I mu khak ngailo lim le bailam tak ah mu thei ah umta kuama mulo ah a guk ah kihotua theina leh lim thang huai tak tak te kithot tua theina ziak te hin ihin khuau eisusia zo ahi. Chun bang gual in um lehin le kiven na ding damdawi leh condom umta, I nawp dan dan in um lehin le mualpho lo ah umtheina ahi tin aphalo lam tak in guaranty kilak maikin, kuanman eimulo poleh ti ziang hi amutu Pathian ading ah kidak um leh alung natna lam tak ahi. Kiven theina langai damdawi leh condom hin natna phalo leh pathian lungnat na apat in zalenna a hun pia thei puai.

### (4) KHAM THEINA SAL AH TANG:

I gam Christian gam iti zinglai in Christian hilo te gam te sang in khamna thei suak ah tang a ale bangzat hem in kitam ngei ina. Tulai igam ah minu mipa nungak tangval bep le hitalo in naupang kum ting nailo le khamna thei sal ah tang muding bangzat ahem I umta mai

ahi. khamna thei sal ah tang haksat dan chu atangte leh a insung mite thawknau akibang ahi. "Gul chuklo in Gulgu ahepuai "ti paunak in agen gual in, zia gual haksatna ala tuak khalo ten hethiam puan tin uh, a tuak khaten vang ahaksat dan gentam ngailo in I hiat thiam mai diu gingchak aum hi. Atang laklaw pawt nuam pawt theilo te hinkhua lungsiat aum ua etzo ahi puau. Thil phalo ahi ti ahiau ah thipi ngeiding kahi tile aheu hi, himaleh atang chu ahimai ui, haisan ahaksa taluai abawl khalo lahi leh patep damai in, a kipan pan lahi inle sal ah latan masang in haisan mai in, lanawp ah la haisan theilo hun hungtung ding ahi. Thagau mi mama Pathian ngaisak kikhawpna ngaina, biakna lam him him ngaisak, himaleh achate, apawsal, azi, khamna thei sal ah tang le tampi aum kit hi. khamna thei sal ah tanna ziak tampi um intin zia te lak ah aziak hiding ah kangaituana khat chu thil bangma ingailo chep leh muam zalen tak ah I bawl mai hin khua henailo naupang te ading in khamthei ahun zil pat nading ua step I bawl piak

ahimai hi. Ei nek ahi ziakin bangma lo in angai ah himaleh I chaten hun bawl leu I dawi lo hial ding I bawl ua, ziaziak in I chaten bangman anagaipuu a ahung khang lian masa amuam achep masa ahung hi mai uh ahi. Nang bawn ziagual chu langainep leh tulai hun ading ah zia khamthei maimai chu I chaten bangah hung ngai ding ahiu em ti ngai tua kham taka hi. I chate khamna thei sal ah atan ding I phallo leh eile kika-wi thiang mai hitiu. Kuama suangpi ah akipal ngaipua mawlkang neucha mukham hilo khat ah kipal zaw ahisek ui. Zalenna chu alian apat bep hilo in aneu cha pat le I zalen ngai ahi. insung leh gamsung ah khamna thein ah I zalen tak tak thei nadin bangma I ngailo neucha cha chep leh muam te a pat iki suk thiang akul ahi. Zia chep leh muam hin ka thagau hinkhua adal puai ti ah ki thiamchan cancer natna anei nung ah lung gim mama ah achep leh amuam haisan himaleh pahchuam talo mi bangzat ahem kamutai. zia la lei taksa gitlo na hung piang bawn asuk khak thei leh la kigen thian mai mai chun la

thagau sukhalo diak din kaging chapuai. Chep leh muam hi thil neucha dan in ngai in genthiam ten lehinle natna phalo cancer, asthma, lungchang natna(heart case) apat kigen thiango diak puai tiu, avagei nung ah kisik sang in ahun lai ah haisan ap-hazawi. zalenna dik chu agen ah gen thaw chi ahipua anei ah nei thaw di ahizawi.

**(5). LEIBAT SAL AH TANG:**

Tulai I gam ah SAL tan na lianpen khat chu leibat sal ah tan hi ahi. Leibat sal ah I tan na ziak tampi um maleh atangpi in I neizat chung ah I lung awi zolo ziak ahideu pen hi. Akbar lengpan Birbal kiang in Birbal nang mipil, Mi hausate le akid-ailo, mivaichate le akidai diaklo, mihing khat a ding hin bangzat mawng mawng akidai in bangzat hin aki lung awi thei diam? ti adawt leh Birbal in mihing khat akidai nading leh alung awi nading in aneizat sangah tamzaw deu apawimaw hi ati piak hi, Ahau in kaki ningting tai la tilo. Avai in la kaning tingtai tidiaklo ahau leh avai dingah pawimaw chu anei zatsang ah tamzawdeu chu ahimai ahi. Tulai I gam ah neizat sang ah tamzaw

deu i dawi na ziak in bat I la khenkhat vang chu apawimaw ziak le hilo akiman bek ziak leh awl ah installment ah piak-thei,ahiziak leh anei sang ah tamzaw deu dawi naziak mai ah batla bang tampi aki um ahi. Govt. nasemtu khat in,” thalaw nei hi batlak na thei bep ahi” ati hi adik mel khawp mai. Govt. nasemte bep hitalo in Pathian na sem /Pathian chate tamtak leibat kawl ah tan ziak ah agen ding bang gen ngamlo abawlding dawl kilawm bawl theilo kisanla sal ah tang khawitak ah um lele nuamsa tak tak theilo, lungthim leh taksa zalenna nei thei talo tam pi mudi aum ta ahi.. Thalaw tamlo suanlam ah bat tam pipi langam, lak ah awl ah piakthei ahinai ti guarantee ah la amuna ding leh aditkit nading bangma muna ding neibe le hidiaklo mawk hansen mai, leibat hauziak ah insung ah, nupan kal ah, chale nau kal ah insak inthang kal ah kihiat thiam lona, kitak san lona apiang ah, leibat kawl ah tan ziak Pawsal khat in agen chu, Jesu hung kin leh kanuam e atia bang ziak in maw? ti adawt ua leh kabat ditding ka huphul ta-

lua bat kisit hi kangai khawp ta-lua tai, van gam ah la bat kisit na umta sam puantin ati. Bat sal apat pawtdaw thei nading in Jesu chu hung tamawng lele bat dit peilo chu vangam akai tak tak nadium ti le ngaitua kham ahi.

**Conclusion:**

Pathian thagau umna taphot ah zalenna aum sek hi.. ( 2 Cor.3:17) Nang leh kei bang sal ah I tang emle ? pawl leh pawl kikal ah kihiat thiamlo na ki ngaidam lona sal ah, zalenna matkhial zia ah zalenna sal ah, Numei leh pawsal kal ah thang tatna sal ah, Khamna thei sal ah, sum leh pai leibat sal ah tang ihi em? suak hilo ding in lalpan eitan daw k ta, tatdaw hinung ah bang sal ah tang nalai ihi em? Pathian thagau umna zalenna aum ah zalen lo I hi nak laic-hun Pathian thagau I kiang ah

aum leh umlo kingai tua paw-imaw ahi, zia achung ah sal tan na ka hun taklat lo tampi belap thei um ngei ina ziate apat zalen lahi chun mivangpha Pathian dawigual ah hing hin latin, Pathian kiang in kipak thu gen inla ziagual sal ah tangkha lodin don in. Zalen nailo lahi leh Lalpan zalenna hun bawl piak sa ahi tai. hangsan tak ah lapal then ngai ding ahi. Lalpa hatna suang in hung kipan kit in Lalpan zawna hun pia ding ahi. Hatna eipia tu Christa zal in bang kim kabawl thei hi. Paul in agen gual in zam mai lo in hung kipan thak in hatna hun pia Christa zal in zalen ngei ding lahi.

Simtute Lalpan malzawl ta hen!

--o0o--

# PATHIAN NASEP

~Rev. Lallarmawia

*Sr. Executive Secretary, Manipur Synod*

**A**postle Paul chu Khrista sawlchak in ah ki gen sek ah, zia chu khrista suak (slave)ahi dan ah ki genna ahi. Akotu leh a sawltu chu Paul in a hechiang ah Pathian miguat ah hi dan leh Pathian a ding ah sem ahi dan ale akihechian ma ma hi.

Nasem tu tihin suak leh sal...apu a ding ah sem pumlum tina a kawk a. Ama a ding a sem hilo in apu leh ama neitu a ding a kipumpiak, ama dawidan hilo a, agawitu/aneitu dawidan a semtu ahi ti a chiang ahi. Zia bep lo ah chun hun bik ahem dak kal tiam neilo a, a hun leh a hinna pumpi a pu a ding ah sem tina ahi bawk hi

Kua a ding a sem ka hem? Kua na ahem ka sep? ti hi kingai-tua zing a ngai ahi. Ei uh hile Pathian in a kochuam ah nasem ding a akote ihu ti kihiatchiat hi tiu, maleh ihiatmil sek uh chu kua a ding a sem, kua na ahem ka sep ti hi ihemil sek ui.

## **I hiat ding uh chu:**

1). Ei ko a, ei teltu chu Pathian ahi ti ihiatmillo ding ahi. Kona hin inner call leh outer call i dawnglo chun nasepna ah losam ding ihi. Kochuamte mang in Pathian in anasem ding in ei ko ahi ti hi hiatchian akul ahi.

2). Eimau na sem i hi puau a, Pathian na sem ihu ti hi hiatmillo ding ahi. Eima nasem ah kingai hi a bailam a, haksat na ituakteu hi -hotute ahem seppite kipat in lungthim nawplo na a um sek hi, maleh eima

a ding hilo a Lalpa a ding ah sem ka hi ti ikihiatchian chun midang ziak in nasep na in aki beidawng ngai puai.

3). Midang kipak sak ding hilo in, Lalpa kipak sak ding in na i sep ding uh ahi. Hotute mitmu ah kilawm nasep hin limna leh kipak natak ei pethei puai. Paul in “mihing kipak sak chu Khrista nasemtu hi puai tiu” ati gual khan mihing nasem hilo in Lalpa na isep zawk diu ahi, zia chun haksatna kal inle kipak man ei pe ding ahi.

## PATHIAN NEI AH LAL GAM NA SEMTU DING CHU KUA TE AHM

### i). Mihangsan te ahi:

Pathian nasemtu Pathian neitu diktak a dawilawkw ngai puai. Bible ah Pathian mite imu zosiau dawilawkw a um ngai puai. Hangsan tak ah Pathian a ding ah ding ngam ahi tangpi ui. Zawlneite chun lal leh vaihawmtute ma ang ah Pathian thu dik apuang dawkw mai sek ui. Amau a ding ah khawkw leh a hinna'u hial tiang lau um inle Pathian lam ah apang zel sek ui. Scotland reformer thupi tak John Knox kha "Pathian a lau a thil dang bangma a lau puai" atiu.

### ii). Midik hi ah ngai:

Hangsan tak ah Pathian a ding ah dingding chu eima dik phawt angai hi. Pathian neitu chu a dik ding ahi. Tulai hun ah dikna din pi hi avang ma ma tai. Sawlkar masawn theilona pen le a semtuten dikna a tak-sap ziaq uh ahem ahilo leh aneilo ziaq uh ahi sek. Corruption hi imel ma lian pen uh pakhat chu ahi.

### iii). Ginumna nei angai:

Pathian leh kochuam

a ding ah i ginum ding uh ahi. Paul in, "Pathian thu guk enkawl ding chu mi ginum hi a pawimawi"(II Kor.4:1) ah ati gual in ei uh hin le Pathian na isepnau hin ginumna hi i vawp zing uh akul hi. Pathian mat tak hi ding in i ginum uh ah ngai hi.

## KOCHUAM AH NASEMTU(OFFICE AH SEMTU TE ETC)HIAT DING:

### i). Hun mat dik:

Nasemtuten ihiat zing ding uh chu hun mat dik hi ahi. Ahun tak ah office kai-te, ahun tak ah committee-te, kochuam programme chuam chuamte, kichena, kikhawpna, mithivui etc..ah te hin vaigeilo ding ahi. Hun mang diklo leh ahun ah thil bawl theilo khawp ah vaigei zing i hieu chun kietchian thak ngai khawp mai in a.

### ii). Thu awina:

Tulai nasemtute hin thu awina hi i zilthak uh apawi maw khop mai hi. Eima hi na kihiat akul ah, i chung ah mite(hotute)thu awi hi Pathian thu ahi. Kochuam khawmpu, Committee thute hi za ah zawp ngei guat ding ahi. Pathian thu i awi gual un i hotute thu leh i

awi ding ahi. Chapona kipat in lululna apiang ah, zia chun nasemtu phalo ei sua a, midangte seppi theilo in ei siam mai sek hi.

### **iii). Kipumkhatna:**

Midangte tawh sep-khawm thei i a mantam in a nuam ahi. Midangte tawh sem-khawm theilo ihiu chun khaw ma ma ahi ti hiat a pawimaw hi. Kipumkhatna neina ding ahin kizatua a pawimawi. Presbyterianism lopina leh hawina ma ma a lian leh a neu chuam umlo hi ahi. Hotu dinga guatte'n le kihotu sak takluat chun Presbyterianism zui khalo hiding ihiu ti ihiatmillo ding uh ahi. Democracy taka chiazing kochuam ihiu hi ihiatmillo ding uh ahi. Pathian nasepna lawting i nei theina ding ua chun kipumkhatna semtute laka i nei uh a kul hi.

### **iv). Pauchapna:**

Pathian nasemtute a dinga galthuam hawipen leh Ama sika a na isepjel theina ding ua chu Ama kiang ah i pauchap jing uh hi ahi. Nasepna hing, nasepna tho, nasepna haldawk, nasepna malzawl tak i nei thei zingna ding un Pathi-

an kiang ah pauchapna hi i thathamlo ding uh ahi. Pauchap ah Pathian kote chun Pathian a nai zel sek ui. Martin Luther chun na ka hau talua, nikhat ah dakkal 6 bek ka pauchaplo chun ka na ka semzo man ngai puai atia. Kochuam nasemtute hin i taksap pen uh pakhat chu pauchapna hi hileh a kilawm hi. Pauchapna nun nei thei khawp ah Lalpa i ko zing chun i nasepna chu malzawl in umlo thei puan a.

A tawp pen ah chun Pathian nasepna hin a lian leh a neu, a lopi leh lopilo a um chuam puai. I bawlthei khel uh Lalpan ei phut ngai puai. Ruth Graham chun, “ Kei chu chak-sang ah nek ding ka siamte, ka pawsal puan-ak ka nawtte, ka chate school chia ding ka buaipite, kuang ka sawpte hi Lalpa nasem ah ka kingai a, limtakin ka sem sek” ati. Ei un le i nasep chiat uh hi Lalpa nasepna'n kimgaitua hitiu. Tichun, Pathian tawh Ama na sem hi ding ihiu.

***“Lim tak in Lalpa na sem hitiu”***

--o0o--



# KUM THAK IN BANG A HUN PUAKE DIAM?

~Evan.T.L.Mang Vaiphei

## Thumasa:

**K**hawvel kum sim dân in, kum thak mel daw-i-um tak mai chu Lalpa'n a hâtna'n ei pui gâlkai kit ta, Lopina Lalpa i piau a hi!

Kum thak ti a hin khawvel lam et in a thak bangma mu ding a um pua, himaleh, hunbi sim dan a chun kum thak chu a hi ta mai hi. *Kum thak in bangma ei puak piak lo ding a hia, himaleh, kum thak ah la thupukna'n la hinkhua hun pui intin, a hun sudanglam thei a hi.* Kum thak hun piak belap ah la umna hi bang giak a hem ngaitua in la, nangma dawidan hilo in, la hinkhua hiun belap piak Lalpa dawidan lampi zui ding in thupukna kichian siam in la zui pan ngal in. Kum thak a hina tawh kitawn ah ngaitua zui ding ah pha gia nuai a hin tamlo vak en khawm hitiu.

## 1. Lalpa'n masawn ding in a hun kineppi hi (Deut.1:6):

Lalpa'n umze bei in bangma a bawl ngai pua, suapi u leh nau, it leh ngai tam tak te'n kum thak mel mu man lo ah thi-na thânmual ei liam san zaw tak nung ua, nang la hinkhua belap piak ah la um hi, Lalpa'n la hin-na daw-i-leh tup a nei hi ti la hiat ka nuam hi. Israel chate Aigupta sal a tannau a kipat puidaw ah um in, Kanan gam zuan ah chia zing ah a kingai lai un, Lalpa'n, *Horeb tâng in la um sâwt talaw tau, kipan un la, malam zuan in chia un,* a ti a hi. Malam zuan

ah chia zing ah kingai himaleu, masâwn lo in a umna ngai un a um zing uh a la hi. Tuni kum thak mel i mu'u hi, Israel chate gual ah Lalpa'n nang leh kei le, i umna mun ngai ah umden ding in ei ti pua, malam zuan ah chia ding in ei ti zaw a hi. I gingtu hinkhua hi umna ngai ah um ding hilo in, khang ding, masâwn ding leh gasua ding ah kineppite chu i hiu. Lalpa'n la hinkhua a tup leh a dawite mudaw ah hangsan tak ah malam sâwn ding in i umna lui uh nusia in kipan thak kit chiat hitiu.

**Malam sâwn gingu la hi theina ding in-**

**(i). La mawpuakna hechian in (Jn.4:34):**

Khristian piangthak la hi chun, Lalpa lam in mawpuakna la nei a um ngei a, jia chu la hechian a pawimaw hi. Jesu'n le khawvel ah a hungna jia a hechian a, jia chu, **Ama sawltu Pathian sawlna gual ah a nasep zaw ngei ngei ding chu a hi.** La mawpuakna hechian in, tichun masâwnna lampi la zui a hi.

**(ii). Umna teltep sakna (II Leng.6:1):**

Khristian ka hi kiti mi tam takte hi mani umna mun ah lungmuan den mai, dindaw gaw lo i tam taluau a hi. Khrista ah hinna nei gingu diktakte chun a umna mun uh teltep a sa pai sek ua, a khang ua, a masâwn ngei ngei sek uh a hi. Tuipi thi chun a la lut pua, a pe daw diak pua, a pa-ngai in a um zing ah, Galili lui in vâng a la lut ah, a piak daw jêl gual in Khristian thi chu a masâwn pua, a um ngai in a um a, Khristian hing chun gasua ding in a umna teltep a sa, a khang in a

masâwn sek hi.

**(iii). A umna puanbûk keklian (Is. 54:2):**

A khang lote â ding in keklian ti chu umze bei a hi. A khang zingte a ding in umna puanbûk keklian a pawimaw sek hi. Masâwn la hi kilatna ding in, la puanbûk keklian in.

**2. Hindan thak ah gâlkai a ngai hi:**

Thi luite chu a bei ta, ngaitia, a hung thak kit tai\_ II Kor. 5:17. Kum thak ah Pathian â ding ah danglam zaw diak ah hinkhua mat ding la tup a hi chun, i hindan lui leh pha lo tampi la nutsia be ding um ngei ding a hi. Jia a lui kiti him him te chu nusia ah, hindan thak ah gâlkai a pawimaw hi. Pathian vâng a pa-ngai zing ah, mihingte vâng a hun leh mun zil in i kisâng kha sek uh a hi. A phalam ah kisâng danglam ngam ding in kisa thak hitiu.

**Hindan thak ah la hin theina ding in -**

**(i). Mihing lui nutsia a ngai hi (Eph.4:22-23):**

I mihing hindan lui nusia ngam lo, kisân danglam nuam lo gingu i tam takluat- at-jiak un, kum hin i hinnau in umzia a nei puai. Lalpa'n la hinna a thiltup sep pitin a hi theina ding in, Khrista thisan ah danglamna hinkhua hun nei phawt in, tichun, la mihing lui chu lipthak ah hung um ding a hi.

**(ii). Pathian khut in kipe tha ngam in (Nas.9:1-5):**

Saul in a hinkhua Lalpa khut ah a pik ngam gual in Lalpa muanna tawh kipe ngam. phawt lechin, la hinkhua'n danglamna hung kilang ngei ding a hi.

**(iii). Khrista-jiak in chân ngam phawt in (Phil.3:7):**

Paul in Khrista-jiak ah bangkim châna a guat gual in, nang le la hinkhua Khrista min ah chân ngam ding in hung kipan phawt lechin, la hinkhua hindan thak gasua hung kilang ngei ding a hi.

**3. Kum thak a hi gual ma in, la hinkhua siam thak in (II Kor.5:17):**

Kum bang zât hung thak hen la, hunpha bang zât mu ma lechin, Khrista ah siam thak kitna panglo in la hinkhua danglamna mu ding um diak lo ding a hi. Khrista ah siam thakna hinkhua chu hindan lui nut-siana kipatna a hi.

**Siam thak hinkhua neina ding in -**

**(i). Khrista ah um zing a ngai hi:**

Khrist mu chian ah pawm ah a dawidan ah hinna chu siamthakna hinkhua chu a hi. Tulai gingu hinkhua hi Khrista chanchin hetu i hiu a, a zuitu leh a thu jawmtu i hilo-jiak un, siam thak hinkhua i nei theilo uh a hi.

**(ii). Nunlam ah thil umte hetmilna (Phil.3:13):**

A phachuam lo ding hetmil lo i hau takluat-jiak un, i masâwn thei puau a, siam thak hinkhua i nei thei puau. Pâwm tâklo, hindan phalo, tepte tâklo teptena chu gilona a hia, jia chu gitlona hinkhua chên zing tina a hi. Lalpa pawm tâk hinkhua daltu la hinkhua um zosia nusia

mai in.

**(iii) La hinkhua a khut in vawpsak zing in (Ps.90:10):**

Siam thak hinkhua i neina ding ua dâltu um chu, kuama'n ka chung in thu a nei puai. Ka hinna chu ka thu a hi ti ah i hinkhua ei â dan ah kingaitua ah mani ut dân dân ah umna hi a hi. La hinna chu Lalpa â a hia, nang â hilo a hi ti hia'n la, la hinna hun petu Lalpa khut in vawpsak zing in, tichun siamthak in hung um ngei ding la hi.

**Thutawp:**

La hinkhua belap ah a umna hi Lalpa lopina ding i mang in la, nisin in Lalpa hepi zaw deu deu ding leh masâwn deu deu ding in la kal hun suan pan thak kit in. La hinkhua belp ah a umna hi Lalpa'n la hinkhua ama â ding ah l danglamna hinkhua mu a nuam hi ti hemil kin.

--o0o--

**OFFICE AH LEKHABU MUTHEITE:  
(Kochuamte a dinga pawimaw zing)**

- |                                |         |
|--------------------------------|---------|
| 1. Hebraite Lekhathawt         | ₹. 70/- |
| 2. Biakna Dan Bu               | ₹. 40/- |
| 3. Nupan Chungchang Danbu      | ₹. 20/- |
| 4. M&E Kikaihaina Bu           | ₹. 20/- |
| 5. Pension & Provident Fund Bu | ₹. 20/- |
| 6. Danbu (Constitution)        | ₹. 10/- |
| 7. MPYF Guide bu               | ₹. 50/- |
| 8. MPWF Guide bu               | ₹. 50/- |

*leh Bible hilchianna bu chuam chuam a chawk thei zing hi.*

# LALPA KA PHAW, KA LUDAWM SANGTU, KA LOPINA

Sam:3:1-3

## Thumapui:

Israel lalgam ni a kisua masang in Lalgam khat in a um un, zia hunlai ah chun leng minthang tak tak a phau a, amau chu Leng Saul, Leng David leh Leng Solomon ahiu hi. Zia leng pathum minthang tak tak leh lopi mama pathumte laka hin leng David in Lalpa ah muanna a kawidan leh Lalpa ama a dinga a phaw ahidan, a Ludawm sangtu ahidan leh a lopina a hidan a gente apat in ei uh a ding in zillai enkhawm leuhin kati ahi.

## LALPA KA PHAW:

Phaw(shield) chu ni-danglai mite'n kidona hun ah amat pawimaw ma mau galvan leh galthuam chikhat ahi. Galvan lau um ma ma Thalchangte ah kipat bitna, chemjam laka kipat kivenhimna, cheicha kipat bitna, vaisuangse kipat bitna ahi. Leng David in galdo thiam ma ma sepai tampi a nei bak ah galvan hawitak tak tampi le a nei a, galdona kimang Sakawl hattak tak banah Sakawl Kangtalai tampi le a nei nalai hi. Himaleh Leng David in zia haw zosia chu ka bitna leh ka Phaw ahi ati pua, Lalpa chu ka Bitna leh ka Phaw ahi atizaw ahi. Leng David in a bitna Lalpa ahidan a hechian ma ma a, zia

dungzui ah chun bangkim ah Lalpa ah a kitulut ahi.

Tulai mite'n i thupi ngai uh leh bitna dan a i nei uh leichung Sum leh Pai haw bang ala himai sek ahi. Lalpa Jesu'n Sum chu a lem ahi gual in Sum lem in gualpha hawl un ala ti ahi.(Lk. 16:9). Himaleh tulai mite'n Sum a lem ah bawlo in atak taka bawlin zia bep chu buaipi leh dawipen ah nei in ila siatgawppi tau. Sum chu i gitlonateu kipat kiselna leh kihumbitna'n i mang ua, i tualthanateu kipat kihumbitna in i mang ua, i diklonapiu ale a dikte zaw theina din gawlgukna in i mang uh ahi. Bible ah Mihausapa'n le a damsung in Sum longal muan dang leh kingakna

dang a nei pua, a bitna pen leh a hinna pen ahisak hi (Lk.16:19-23). A hinkhua a beiphat in Meidil ah gimthuak in a um maita ahi. Tangval hausapan le Sum chu ahau ngei mai a, zia chu a bitna leh a hinna dan a angai ziaak in Jesu kiang ah kipat in a chiamangta ahi (Mk.10:17-21). Amau bep hilo in Sum sangawizaw dang neilo, siatna khukupi sung ah luta kawltang tampi i um tau ahi. Bitna dan a mitampite'n Sum i nei zinglai un Bible in zia gual hin ei hil ahi."Dangka sum ngainate chu dangka'n lungkim diak pua'n tin uh; hausakna leh lawkna ngainatu chu lungkim diak pua'na."(Eccl. 5:10). "Muna leh bitna a um hi a tilai tak un, numei nauvei gual in thakhat in manthaina a chung un hung tung intin, zia kipat chun sua kcha puan au"(I Thes. 5:3), ati mite i hikhak ding a alau um hi. Suapite, ei un bang Phaw i nei uh em? Lalpa Phaw neikhalo ihu chun mangthai ngei ngei ding ihu ahi. Leng David hilhial in bawn "Aw Lalpa, nang ka Phaw la hi" ati ahi.

**LALPA KA LU DAWM SANGTU:**

Leng thupi leh minthang ma ma David in sum leh dangka a hau ma ma ban a, In thupi tak, In hawitak giaksenglona, cheng senglona a nei ding ti hetsa ahi. Gam leichang, mun leh mual le hau mama ding ahi. Zia beplo a chun, a khawnbawl upate (cabinets) pil mama leh vaihawm thiam ma ma le tampi nei ding ahi. Ama panpitu ding, kim leh leh kiang ah Leng tampi tak nei nalai ding ahi. Himaleh, Leng David in ziate zosia ziaka chu dawpkang a um ka hi ati diak pua, Lalpa'n chu ei dawmkangpa hi ati zaw ahi.

Tulai mitampite'n mihing ah muana i kawu ua, ama ahi sepna hung petu, ama ahi sum sanction ei petu, ama ei panpi ziaka leh tundingna zia ka zia tiang hi tung ihu tibang ihu ma mau ahi. Bible in," A nak ah hattheina ziaak bep a, mihing thitheite hi nusia in, bang ah pang ding ahiu em? ati ahi (Isai 2:22). Mihing muang ah, mihing hatna kisanpi ah, a lungthim ah Lalpa nusiata chu, hansia dawng in um uh hen. ati ahi (Jer. 17:5). Milian milalte muang kin la, panpi theilo mihingte ah chun kinga kin, ati

ahi (Sam. 146:3). Lemg David hilhial in Aw Lalpa, nang ka lu dawm sangtu ati gual in ei unle tithei leuhin ti igen nuam ahi. Lalpa chu ei tungdingtu leh ei dawmkangtu hi henla, zia chu hechiantute hi in, Lalpa chu ei dawmkangtu ahina gual in chawihawi thei ding in um thei leuhin a ut um ahi.

Mikhenkhatte gual a Pathian kiang ah dawn ah pauchap jing hingal, a lawting phat ua le Pathian leh a pauchapnate hemil mai mai ziang tibang a umthei ahi. Et-sakna'n, mikhat Lawng neucha khat ah a chuang le thigawpi a hung nungta, Pathian kiang ah ei hukdam in ati le Pathian in a hukdamta, tichun huipi'n tuipi pam in Pathian in a sep-daw piakta ahi. Ahinla, ama chu thiding ka kisakle, ka vangpha na e! atizawta ahi. Suapite! Pathian dawpkang i hilam kihetalo ah, i lekhasim hapan zia ahem, i kukal zia ahem, midangte sanga i thiamzawk zia ahem, i vangphat zia ahem po ihisak khak ding alau um hi. Leng David gual Lalpa nang chu ka Lu Dawmkangtu lahi tithei chiat leuhin ti igen ut ahi.

## LALPA NANG KA LOPINA LA HI:

Suapite haw, bang ahem ei uh lopina? I melhawinau maw? Eilawi chu melhawi iki-tiu ua le mi dungchan leh mi duangchan le kipha zolo a, tak-sa hatna tileng la piandan ah ineu zia u aliante hatna kipha zolo zel ahi. I namneu zia uh a diam na khat leh thilkhat isep isep uh lehla changlam-veil-am en lap lap kawma, mitphe lap lap kawm ipguk ding, kawiguk ding leh lakguk ding dan lungthim neingalte hi leuhin kiawlm ma mate ihu ahi.

Inchen Lochen tileng la zani mai ah Pucca building nei pan pante ihu a, hausakna lam ah tikit leng la min a khang-akhang ah le a nekwawlo ding uh leh a matzawlo ding uh sum nei ua, eilawi a Hausa sun sunte la ( a chate hung lian pan pan) agoteu kikim hawp dinga um hizello maw? Hilo! suapite haw, bang ahem i thupinau, bang ahem isuan ding uh um? Ka teirol limlai in ka lawite khat in " Zia Bike hungtai chu la mu em?" ei hung tia, ken, "ka mu ma e" ka tia. " A tuilo chung ah chuang ahi" eiti ahi. Zia chule

a dan um nalai ahi, ama nei-  
sa a tuilo zuak a Bike chaw, a  
chung ah chuang ahi. Himaleh,  
tulai mite a nekguk, lepguk  
leh a gukchak leh thingtanga  
migentheite Inchung khuna  
ding Government in a thawn  
ah ahawm ding Langva (CI  
Sheet) chung bang leh a dang  
dangte chung ah chuang ah tai  
a hinalai ui. Mikhenkhatte la  
migentheite chawikhawm leh  
thawkhawm chung ah chuang  
ah, ziagual sumte chu kisuang-  
lana leh zachatna nei hetlo ah an  
nekhawmna ah mangnalai, hi-  
maleh kithupi sak ma ma nalai  
timbang ki umthei zel ahi. Bang  
ahem i lopinau leh thupinau?  
Leng lopi ma ma ziang David  
in, " Namh Lalpa ka lopina la  
hi"ati ahi. A gam sung ah sepai  
muan um leh thupi tak nei, gal-  
vante, sakawlte, nek ding bu leh  
bal bangma kitasam umlo hhim  
him himaleh Lalpa ahi ka Lopi-  
na a ti ahi. Suapite, ei un le Lal-  
pan i chung ua thil ei bawlpia-  
kte nung et thak kit in, thingtang  
dawn ah piang a, thi leh hin kal  
ah khawsa ihidanteu hemil pai  
mailo in, " Lalpa nang la hi ka  
lopina uh" iti thei uh em? Eima  
nunglam(background) chiat

kien thak leuhin iti ahi. Leng  
David gual in Pakai, Lalpa,  
Mangpa, Toupa, nang ka lopi-  
na uh la hi tithei chiat gawle uh  
hin i tiu ahi. Jesu Khrista lon-  
gal ei thingtang mite'n thupina  
suan ding khat le i nei puau ahi.  
Uihikte- thosi thovai haw tawh  
khawsa khawm mai ihilam uh  
hemil puai tiu.

**Thutawpna:**

Pakai nang, Lalpa nang,  
Mangpa nang leh Toupa nang  
ka phaw uh la hia, ka Lu uh  
dawmsangtu leh Ka Lopina uh  
la hi, ti in A angsung in kitulut  
thak chiat leuhin i nuam ahi.  
Ama longal ei thingtang mite'n  
i suanding leh i bel ding kuama  
dang i neilo uh ahi. Leng David  
in a chapa Solomon kiang ah a  
gen gual in, Lalpa limsaklo ah i  
nunggat san ngei ngei uh chun  
kumkhuan Ama le ei nung-  
gatsan ding ahi (I Chr. 28:9)  
ti ihiatmillo ding uh ahi. hun  
nunung ahita, Lalpa Jesu'n a  
mithiangthote pui dingin hung  
kit hak talo ding ahi ti hejing in  
kimansa'n um chiat hitiu.

*(Courtesy: Manipur Express, Dt  
01/12/2019)*

--o0o--



# PATHIAN THU GEN DING DAN

## (Homilitics)

~Rev. Dr. Hangpi Manlun

### 1). Thumapui.

**T**uni igen nawp pen uh ahileh biakin ikaisin un thugen hi (preaching) a pawimaw pen in ikawi ui ti len tikhiallo ding ihui. Sermon i hagen dan uh tawh te in kuaman kathiam tai ti thei ditng a kium puai. ziakachun, a pawimaw dan gen ding ihui.

Amasapen in, 'Homilitics' ti hi Greek pau a 'homily' kiti akipat a lakdaw ahia, zia chu ahina ding bangtak a thugen ding a 'kising sakna' tina ahilo leh 'guanggal' tinate ahi. Chuleh, 'homily' ti chu achawmkim in genta len, thugen ding dan kikawk muna leh kizilsakna lam chu 'homiletics' a ki ti ahi.

Ziabanah, Greek thumal 'kerugma' hile 'thu tangkopi' ti a ledaw ahi (Nasepte 8:5; 10:42). Ziabanah, 'kerygma' hi 'keryssein' ti apat a lakdaw ahia, a umzia chu thugenna ahia, zia thutak gentu chu 'keryx' ahi. Ziabanah, 'hiatsak' tite le ahup ahi (I Kor.1:6; II Kor.4:2 leh I Tim. 4:6). Chun, 'thugen' tihin 'thuhil' tinate ban ah, 'tilkhona' tinate le a huap ahi.

Chuleh, Alan Richardson in, "Keryx' chu mi kuaman a hetlo uh thu thak puangdaw

(tangkoupi) tina ahi" a ti ahi. Chun, zia hin a tup ahileh thu hawi-leh- pawimawte a puandaw maimai uh hilo in, Pathian nasep lopi tak puandawna ahi ti'in C.H.Dodd in a gen hi.

### 2). Thugen (preaching).

**chu Latin thumal 'sermo' (discourse)-ti a kipat a lakdaw ahi.**

French leh English-ten, a laksawna ua 'sermon' tin i he'u ahi. Chuleh, 'sermon' chu bang a hem le? A umzia chu mipi hiat ding a mipi masang a ding a, thugen zosia chu 'sermon' ahi em? Ahiloleh 'sermon' chu bang a hita diam le? Concise Oxford Dictionary chun, "Sermon chu sakhua lam kizilsakna leh kitilkhona thu pulpit apat ah puandaw ahi" a ti ahi. Ahin sermon hilou 'lecture' a um kit ahi. Zia genchetna pat a i taklat uh hin 'lecture' le a huap khathei thou ding ahi.

Ahin, sermon a um-zia ahileh thugen, thuhil, chanchinpha gen, Pathian thu tangkoupi tinate ahi. Greek pau ah 'euangelion' ahia, 'chanchinpha gen' ti'n le akiletawdawk ahi. (Nasepte 8:40; 15:7; 16:10). Chuleh jawlnei ahiloleh kochuam nasemtute thugente khu le ahi. Chun, Bernard Manning gen dan in, "Sermon chu thu taksa a hung suak/piang, thu zikah pang, paukam a puandaw chu ahi" a ti ahi. Zia hin tepte ding ni, i nei ua, ziate chu ahileh, a chawmkim in gentalen, 'Sermon chu Pathian leh a chanchinpha puandawna ahi. Zia chu i thu gen in, Pathian hina gen chet a, Bible thutak a kingaklo leh sakhua thu himaleh 'sermon' ti theilo ding ihu a, 'lecture' hi zaw ding hi.

### **3). Thuthung Lui leh Thuthung Thak ala kimatdante sui hitiu.**

#### **3.i). Thuthung Lui hun a Juda sakhua ah kimat dan.**

Thuthung Lui ah chun a chawmlam lama thugen chu nasepna chikhat mai in angai u'i. Sabbath leh ni pawimaw dang kikhopnateu ah Dante a sim jelsek u'i. Ezra hun laia a kipat in, a alasim pan u'i. Zia nite-ah

chun 'Dante' chu a bul lam ah Hebrai pau in a sim ua, zia chun Aramaik pau in a let ua, tichun Targum a tiu ahi. Zia kipat ah chun Sunagog-a thugen ahung kipan a hi. Thugentu (darshan) ti pau kam hi kum BC khatna a kipatin ahung langta hi. Thugentu chu a thugen ding masang in hawitak in a kisinga diam a, mite thuzaw zou ding apuang ding lam-et ahiu. Zawlneiten le ahun lai un thu ala gen zing sek u'i.

#### **3.ii). Thuthung Thak a kimu dan.**

Thuthung Thak hun in ahileh thugen chu 'Sunagog' kikhawpna ah mun poimaw tak a lua ahi (Nasepte 15:21). Thugen chu Thuthung Thak a kimu nasa mama a, i gensa gual in Greek pau in ahileh, 'kerusein' khu Bible ah 60-vei a kimu ahi. Ziabanah, Lalpa Jesu leh Sawlchakte chu sermon gentu masate ahiu ahi. Pentecost ni a, Thagau Thiangtho ahung tun ni-ah khan, Peter in mipi hung khawmte kiangah, Pathian in Jesu Khrista kipat a hukdamna na a sep thu leh, zawlneite pat a Pathian thutiam a guitungna thu a genna i mu ahi. Zia chu

Thuthung Thak huna Sawlchakte thu gen i mu masakna pen uh ahi. Ziabanah, Stephen, Paul leh sawlchak chuam chuamte thugen le i mu uh ahi.

#### 4). Pathian Thugen in atup.

Pathian thugen in atup-leh-ngim chu i hetlo leh thugen lawting leh lawtinglo hetheilo ding i hi. Chuleh, thugen in a tup-leh-ngimte ahileh:

- i). Lalpa Jesu Khrist chungchhang thute,
- ii) A thina thu,
- iii) A thawkitna,
- iv) Lalpen hiding a siam ahi thu, v) Zawllneite thugen bukimna, leh
- vi) Mihing in mawpuakna a nei dante zosia leh adangdangte ahuap ahi.

Ziabanah, a chung ahte kipatin, chanchinpha kigen hetute chun, i) A gitlonate uh a kisik ding uh, ii) Gitlo ngaidam a chan ding uh. Ziabanah, hukdamna chang ding a Khrist kiang ah gingloute pui a 'Nungzui dinga siam dingte' (Math. 28:19), leh, gingtute Khrist batna lam a sukhanglian a, sukdet a, thamuanna chansak a, Pathian tawh kipawlsak guat dingte ahia, 'Ka belamte vak in' (Johan

21:16), tite le ahuap ahi.

#### 5). Thugentu hina leh um ding dan.

Chuleh, thugentu ding in Bible chang hawitak asim a, pauchapna tawh akilat masak a, a hithei leh lekhabu chuam chuamte sim ah a kisingesak ding ahi. Chun, kithagau misak a Pathian Thagau in ei piak dandan ti a pulpit chungvela ngaitua kawm agenlo ding ahi.

Thugentu dingte chu a thiangthei pen a kichei a, mipite tun masang ngei a tun a, pulpit sung ah chutpai ding ahi. Chun, thugen phatle a thumapui saupipi gen mailo ding ahi. I gen tak leh le achawm theipen leh i thugen tawh kituak dingte gen bep ding ahi. Khenkhatten, a thugen ding zat phial uh thumapui in agen ua, zia khu ningtel um mama thei hi.

Chuleh, pulpit chung ah a din phatle a kiphaklam thute, ka kisaman pua, kei amawl pen tite haw genlo ding in ahawi hi. Zia gual paukamte chu kinalgiamna phalo ahi bep hi A lang khat lam ah kithupi sakna thute, mani kiphatna paukam leh i lawi i paite dem na mun ah matlo ding ahi. Ziate chun a

ngaite suk thatbei thei bep hi.

Chuleh, thugen phat le mipite etvel vel (eye contract), jel sek ding ahi. Kun deidui, sik langkhat et et mai tite leh mit sin a vanlam mai mai etlo ding, mipi lam ahithei chana et kual zing ding ahi. Chun, la khut a mi la kawk tak le mikhat/mun khat maimai mawk kawklo ding ahi. A hiloleh la kawk penpen in ama genna sakha thei hi. Ziabanah, thugen phat le ‘nang uh lawi’ ti sang in ‘ei uh’ ti zaw len miten nethei zaw ding ahi.

**5.i). Pilvanna ding dangte:**

Thugentu pilvanna ding dangte ahileh, pulpit chung a thu igen phat le, ahithei chan ah mimal min, chi-le-nam min, ham-le-pau a midem, mi kochuam doctrinete dem mai, thil kidak thei dingte (etsakna ding zun-le-ek)-tite leh adangdangte mawk genlo ham ham guat ding ahi. Ziabanah, gen sasate le mawk gen zinglo ding ahi. Nidanglai mi khatin thugen ding a pulpit ah a din a Bible a simzaw phat in India leh Pakistan kido thu ah apan jel jel hi. Khat kit in ahileh la Israelte Kanaan gam lutna thu panglo in thu agen ngai puai. Khenkhatte ahileh

thu a gen leh min a thugen ding hezo ta.

**6). W.E. Sangster in thugentute het dinga thu pawimaw sagi (7) a gente i enkhawm ding kit hitiu:**

*Ziate chu ahi leh:*

- i). Thugentu chun thupi a gendaw ding a pawimawte a tel masak ding ahi.
- ii). A gen masang in zia thu hin kei kiang ah bang thu a gen em, ti leh zia thu kipat hin bang thu ka gen ding tite ngaitua in a het masak ding ahi.
- iii). Hilchetna bu, Dictionary/ Commentary leh a thugen tawh kizawpthei, panpitu dingte sim in sermon a siam ding ahi.
- iv). A thugen tawh kituak ding a ngaituana thil dang hung kilangte le hawitak a atepte ding ahi.
- v). A thugen ngaithatu dingte chu nguntak a ahiatchian masak ding, ama-leh-ama kidawng masa in bangziaka, zia thu hi a gen guat ahem, bang hem agenna ziate, mipi dinmun niam pen chanpha angaitua masa ding ahi.

vi). Tichun, a thugen ding chu a leng in gendawk in.

vii). Zia zosia chu a bawl guat lai in, nasatak in pauchapna tawh a ki-singsak ding, Pathian kiang ah pauchapna kinga zing in, tite hi ahiu hi.

**7). Pathian thu gen chu Kochuam etkawl-na-leh-Thagaulam ann vakna/chawmna ahi.**

Thugen hi kochuam etkawl-na-leh-chawmna ahiziak in, atangpi in thugen dingte chu, zilna neimi leh namdet mite bawl ding/chanvo in i ngai tangpi u'i. Taksa a i nek an hawi in taksa ahawisak in, asuhat a, an hawilo chu i taksa a dingin leg damlona leh siatna tuntheitu ahi. I thagau lam an le zia chu tawh kibang ahi. Chun, gingtute chu belum tawh tekhin i hui a, himaleh belum i batlona a um hi. Zia chu ahileh, neklo ding hiatheina i pianpi puau a, i siatpi ding anche le tuitak in i ne thei uh ahi. Ziakachun, an hawi-leh-hawi lo chu puitute'n a hiat uh a angai a, hawi tak a a etkai zing ding uh ahi.

Chuleh, thagau lam, chawpna thu hawi chu Pathian thu 'Bible' ahipen mai hi. Zia mai mai chu thugin leh 'thil-

bawl tena diklou thei lou chu' ahi. Lalpa lama mite puiulutna dingin, Bible ah Lalpa Jesu thute kan ah an hoi a um pua, Ama gingtute suphatchuamna ding inle Bible thu lou chu vakna ding dang a umlo hi. Ziakachun, Kochuam chawmna thugen dingte chun Bible thu a het tam ding uh ahin, zia chu tawh kituakin kochuamte ahiljel ding uh ahi.

**8). Sermon in thupi khat achun ngeingei ding ahi.**

Thugen (sermon)-khat i gen phat le thupi khat tup-lehngim nei a gen guat ding ahi. Chuleh, suklat nuam thupi khat la nei chu la sermon pumpi in azawp suakkei ding ahi. Zia-banah, la suklat guat thupi chu le la hiatchian masak ding ahi. La hiatchianlou thu la gen chet theilo ding ziakin la changtel ah bulphut inla, lasim dawzaw phat le thu dang ah lutsan kin, thu pawimawlote mawk gen gen kin.

I thugen chun, Bible thupi achunlo leh meikhu gual in leng mangthei ding ahi. Ziakachun, sermon ah a thupi leh a mantam pen chu athu tak chun ahipen mai hi. Zia gual

chu ahilo leh thauchang kithun lou a avui toh sa i kap tak le a ginse mai mai tawh kibang ding ahi. Chun, vei leh dawisak kisa ma ma a, ut zosia leh vei zosia chu Jong thingbak-japgual a kibat vel vellou ding ahi.

**9). Pulpit nel talua leh main-gap talua in bawl kin.**

Pulpit chu mun thi-angthou leh Pathian thu zaum tak tak te genna mun ahiban ah, la thu gen in ngaithatute lungthim ahilou lam a apuikawilona ding in pilvang in. Ziaziakachun, pulpit sung ah thu la gen phat le, dutui talua kisa a, pulpit bet gawpgawpte, kengtaw tate, ahilo leh pulpit a pat a pawtdaw a tual lak ah vavak velvelte chin lou hawi ding ahi.

**10). La thugen chu nangma hina hi zel hen.**

La thugen chu ngainawp hisak guan, nangma dinmun tawh kituaklopote leh la zuilo thute mawk gen ding ahi puai. Thugen thiam leh ngainop um, mite ngaisangte la mu leh abawl dan uh ettawn gawkin, mite tawtbawl na hi mai mai ding la hi. La thu ngaithatuten nangma hina mama ngaitha uh hen la, pulpit chung a kisiam lam dang

kawm mai pen mi'n amu nuam ngai puau.

**11). la thugen phat le kidutuisak kawm kin.**

Pulpit chung a thugen ding a la din phat le dutui beklopi a kituisak kawm tite leh a thu ala bei a mawk ka tite haw bawlkawm guatlo ham ding ahi. Ahilo leh angaithatute nuizatna hi bep thei la hi.

**12). Aw mat dan.**

La aw mat dan a poimaw zia chu, la thugen in mi lungthim athuzaw thei in, a thuzawlou thei ahi. A hawi thei pen a matgua'n.

**12.i) Thaadam taka ngaithak ding in.**

La aw a ul takluat leh angaite ading in chimchak um ding ahi. La uang gen nuam na munte ah la aw sulamdang in. Chuleh, apawimaw dungzui in sang sak in la niam sak ding ahi.

**12.ii). Nangma aw ngei mang in.**

Mi aw leh umdante zui (copy)-gawkin la mi aw mat dan pawng zui ding ahipuai. La zui guat hilou in, neukhat ala kibang kha ahi leh vang a khawk puai. Chuleh, kikhawm mi atam leh aw sangin gen inla,

atamlo leh lah kipawng kou ding ahi puai.

**12.iii). Pilvanna ding dangte.**

I khawhei dan akilawm lo leh ngaithate lungthim chu la thugen in lamang thei ding ahia, la thugen lungthim lamang theite nang a pat in a um ei em ti enchian masa in. chun, la puan ak ban kilip dan, mekkil kikildante, la kivan dante taphot kienchian masa zel in. Ngaithate lungthim lamang thei ding thil bang ahemte lak ah khawhephalou in um kin. La din dan, la bawl dan, la mit hadante le endiktu la zi ahem la nei a hawi hi.

**13). Thukhakna.**

A chung a i gente a kipat in, Pathian thugen ahaksat dan leh pawimaw dante i mu'u ahi. Thakhat thu in a pumpi in,

zuithei pai lo len le bangchan hem khat bek zuiguat ding ahi. Chuleh, mihingte kisingsakna leh panlaknate chu bangchan hem khat a ding in apoimaw mama ahi. Ahin, thugen i lawtintheina ding un, zia i genteu ban ah Bible sim tam, pauchap tam banah, Pathian Thagau Thiangthou puina leh umpina tawh thu i gen leh mite lungthim leh hinkhua ah na thupitak sem ngei ding ahi.

*Lalpa'n simtute ei malzawl chiat  
atta hen aw!!*

--o0o--

## SUKDAM/SUKDIK THEILO LALNA SEMTU A UM DIAM?

~By - Evan. L. Khotinthang

Sukdam ahilo leh sukdik theilo Lalna semtute haw hina tamlo ala enkhawm hitiu.

- \_1. Ama thugen, lunggel bep diksa haw kuaman asudik jo puai\_*
  - \_2. Ama lunggel juiitheilo haw, galmi dan a gelte chu sukdik thei ahi puau ve\_*
  - \_3. Ama ngaituana tawh kituaklo a lunggel nei mi haw, dal pai pai sek mite chu Damdawi bei natna vei ahiu ve\_*
  - \_4. Lamkaina, thaneina mangcha haw chu AIDS leh HIV natna veihaw sang in asukdam dingdan ahaksa jawi\_*
  - \_5. Pulpit ah a dindaw phawt le khat kalna, selphona thugente haw chu Lucifer lungput nei ahiu in asukdamna ding aum thei puai\_*
  - \_6. Lamkaina ah sum(paisa) lam lunglut tinten haw chu cancel natna veihaw tawbang ahiu e\_*
  - \_7. Pathian nasem hingal ah Thagau mangthai puaknatna neilo mi chu kochuam natnapi ahiu e\_*
  - \_8. A sepna kochuam mite dem zing semtu chu Damdawi bei suk-dik/sukdam theilo natna vei ahiu ve\_*
  - \_9. Kochuam ah semtu phung le chang'ah siknei langneina nei-haw, teksete'n doudim vei atiu tawbang ahiu ve\_*
  - \_10. Mi thilbawl khat demna ding hawltei gen tei kiti haw hi thagau buak vawp ahiu e.\_*
- \*\_A Chung ah kigen natna neihaw; eima leh eima Pathian ah kipiak luta, ama kipat damna akichanlo ngal le a damdawi umlo ahi.\_\**

*\_Kochuam mite natna jending ihiule eima kijen dam masat ngaidin kagel e.\_*

--o0o--



# Kipah thuseina

*~Rev. Ngukhongam  
KCC/Dewlahlane, Imphal*

KSP Youth's wingho ngailutna jeh in vei-2 jen eihung tem un ahi le ka kipah in panthei teina dinga Pathen henga ka tao ahin Pathen in DAMNA eipen ka hung pang thei in KSP machal ka hung mun kakipah e. Youth group a Rev. D.Robert Thanga le Rev. Seilunlal ho chung a kipathu ka hin sei ahi. Kum 40 valnung ngailut kilhunghoi ahin aphaí.

Keima chu KSP a dinga B.D masapen kahi jeh in Pathen in ei kithopi jeh in Tuibong Bazar mun a KSPte dinga akhang akhang a um jing ding Office kana boldoh chu KSPte dinga ka toh doh ka sei theipen ahin tun Office jong hoitah le mellomtah ahi tan kipana a bukim ahi tai. 1976-79 sunga keima tah lamkai sunga Lamkaiho Photo chu Youth Golden Jubilee Memorial Memento-1 Office a dinga kahin peh ahi.

Kei phat sung eikithopi hoi ho chu (L) Upa Tongkhojam le, Nu (L) Tingtinhoi Vaiphei (L) Upa Thongjachin Haokip le aji (L) Nu Hoikhokim Haokip Pu (L) Thualjakap Vaiphei le aji Nu (L) Chindoi Vaiphei ama ho hi kei dinga khut le kenga kana kithokhompí ho chu ahiuve. Tun amaho umtahih jong leo amaho jal a na toh loupitah tah itoh doh thei u ahin amaho hi haimil lou ding ahi.

Pu (L) Rev. V.S. Liankhopau in Khuga Sadar Presbytery ana sem doh vang damlouna anei jeh a atoh ding ho jouse chu keima khuta angap banga kagel jeh a Pathen in kei jong ka toh sung (1976-79) sunga chu abul a khom kana tun doh ahi. Kei jong kum 3 cha ahi vangin Pathen kithopina jeh in akhoh cheng kana tongdoh e.

Leilon Vaiphei khopi mun a 19<sup>th</sup> January 2019 nikho, melchih jingna dia CKKP/Youth's Golden Jubilee Committee ten ngailut Memento neipeh jeh un kakipah e. KSP ka toh na melchihna ahitan kahinkho a dinga nei ngailutnao jem ahi jing tai.

KCC a kum 55 val ka toh vang in ka toh na masa Khuga Sadar Presbytery, hi ami le atong ho hi ka ngailut jing ahi. Nanghon jong nei ngailu un kakipana avel a kahin sei ahi. KSP machal jing peh hen.

19<sup>th</sup> January 2019 Leilon Golden Jubilee nikho a KSP lam-kailui ho - Upa D.Siaklam Upa K.Thanga Upa Tongneilal Upa Lamneikhup Upa Khupmang Pastor K.Lala le Pa Lunneilam le adang dan kimukhom thei chu kipa um ahin munchom cheh a kichenga hahsatah hinkho nei jeng boitah hinkho nei jeng ihi jeh un kimuto thei chu kipa um ahi.

**DAMNA AW** Magazine jong a umtan thilsoh jouse het-vahna ahi jing tah apha, kum ahung tamtan hetmil theina khang akilhung tan akihejo jo kihou ding phante.

Pathen in hiche monthly magazine hin mangcha jing hen. KSP Mission Field na nei un machalna chu Tispari Mission Field chu ahi. Idam sung un kingailu to jing ute.

--o0o--

**(L) Upa KAMTINTHANG CHANCHIN CHAWM-  
KIM**

*08<sup>th</sup> December 2019*

Upa Kamtinthang hi Tonglon hausa famta Pu Sumkhozam leh famta Pi Chawngzakhawl te chapate laka a panina ahin, Tonglon 'D' khua hausa ahi.

Ama hi 15<sup>th</sup> March 1924 (Sepkitni) in Tonglon khua'n a piang hi.

Kum 1938 kum in famta Pastor Khaivung khut ah Baptisma changin Khristian ahung hitai. Chun 23<sup>rd</sup> Nov. 1947 in a hepi pen famta Pi Ningkhawkim tawh famta Pastor Khaivung khut in kochuam dan thiangtho in a kikhutsui un, ama hi sawlchak famta Hemtinthang a dingin thagau lam a dinga agasua masapen ahi.

Kum 1955 in Tangmual khua sattu'n apang in, 1955 November tha in Tangmual kochuam ah Upa ah teltin ahung hi'n, 2<sup>nd</sup> January 1956 in ICI khawmpi Kangvai khua ah chun Upa ordained ahung hitai.

Kum 1956 February tha in Saipum khua Bishwas Revival bawlna in tui ah leh thagau ah pianthakna kichiantak nei in, chep leh muamte a haisan tai. Pathian gam letna dinga mi kipezo tak hi in, tupna giltak nei leh mi hangsan tak le ahi.

Kum 1956 in Tangmual khua Biakin a khatveina ama mapuina in din ahia, 1970 kum in a niveina adin kit ua, zia nasepate ah akithuapite chu (L) Pu. Genkhopau leh (L)Upa Ginlam te ahia ah, chuleh a thumveina dingin 1988 kumin Biakin sakphat kit ahi. Ama hi khawtang leh Kochuam ah vaihawm tu ahia, vaihawm thiam leh lungpi khual tak mi ahi. Chun, Khuga Sadar Presbytery huap sunga Lalpa Grep huan ah thi leh thau kihel ah nasem mi ahin, Pathian gam chu thu in a um puan, thilhitheina um ahi zaw'i(1Kor.4:2). Zia thu hi a hatna leh a thilhitheina thagui chu ahi. Manipur Synod ah lam inle min aguatna tapo ah nialna nei ngailo mi ahi.

Khuga valley leh Sadar hills, Manipur gam ah Presbyterian kochuam phudawktu mi pawimaw mama khat ahi. Presbytery kiphudaw kum apat hun tawp tiang ah a hatsung zosia standing committee member hizing ahi.

**Khuga Sadar Presbytery sunga ala nasepna tepte takdeute chu:**

1. Kum 1970 kum ah Moderator ahi sungin District/Bial 5 ahawngdawk ah, zia te chu
  - (i) Thangting District, Mata Lambulane Biakin ah - 10/04/1970
  - (ii) Kobru District(Sadar hills) Leilon Biakin ah - 30/04/1970
  - (iii) Sadar District, Gawtangkawt biakin ah - 06/06/1970
  - (iv) Khuga District, Kangvai biakin ah - 03/10/1970 leh
  - (v) Tuithanak District, Mualkot Biakin ah - 24/10/1970
2. Khuga Sadar Presbytery ah Moderator ahina kum te:- 1970, 1979, 1991 leh 1994 kumte hi ahi.
3. Kum 1981 in Office incharge in teltin ahi.
4. Kum 1982 in Executive Secretary dingin teltin kit ahi.
5. Kum 1987 in Executive Secretary dingin teltin kit ahi.

**Synod leh Assembly palai a sawl ah aum nate:**

1. Kum 1981 in Cachar Hill Tribe Synod, Mualhoi khua'n Palai in achia hi.
2. Kum 1985 in Khasi Jaintia Synod, Cherrapunji in Palai in achia hi.
3. Kum 1978 in Mizoram Synod, Mission Veng, Azawl in Palai in achia hi.
4. Kum 1995 in Mizoram Synod, Zarkawt, Aizawl in Palai in achia hi.
5. Kum 1979 in Churachandpur ah Assembly Khawmpi hun in Khawmpi hawwna Bible dawmtu in apang hi.

**Member ahina dang dang te:**

1. Kum 1959, October ni 11 in Joint Synod Presbytery akinei pan a, Mermber in kum 19 sung apang zawm to hi.
2. Kum 1960, November ni 19 in Bible Society of India, Chura-

chandpur Branch akinei pan a, zia chun 1996 tiang in, kum 36 sung member in apang zawm hi.

3. Kum 1978, May ni 14 in Mnaipur Synod piting akinei pan ah, vaihawmna masapen Saipum khua in member hina tawh apang hi.
4. Kum 1991-1996 sung Manipur Synod Treasurer/ Finance Officer hina achang hi.

A damsung nikhua a Bible chang dawī ma ma chu Johan 15: 4,5 '*Keima'n um zing un, Kei le nangmau ah umzing ing ka*' ti hi ahia, ala dawī ma mate chu - LTT Sut 4na. No. 277 '*Ka kiangin umzing in Lalpa*' ti leh No.207 '*Jesu heipina leh phatna*' tite hi ahi.

Kum 1980 apat in Insung maicham nisin ah pello hiala neizing mi ahin, mi ettawn tak pen pente lak ah pang ahi.

Kum 1996, June ni 3 ni in a Hausakna Tawnglawn (D)/ Tawnglawn Dumdephai khua Suangphuna anei ah, alawpna' n Sial 1 leh Vawkchal Tuk 5 in luaithena asiam hi. Ahin, Kum 2000 vel apat in taksa upat zia leh natna zia ka ten ahung ki enkawl pan ah, ataksa hatna ahung kiam deu deu ah, tichun Kum 2009 apat in a lungthim ngaituana le hatzo talo in anung leh ma hiatzui lona leh thu leh la tepte theilo leh lungthim lam mawl na in ahun tuam deu deu ah, himaleh chingthei taka ahinkhua amat zing thei zia kin mi tangpi in ahe daw k zo ngai diak puau.

Zia guala hi hun ahung matto zel lai in kum 2019 kumthak zingkal tiang in Biakin atung zo ah, inmun in ahun ahung mangto zel ah Dt. 24<sup>th</sup> November 2019 (Pathianni) a kipat in hitang khawsik in a um in, **26<sup>th</sup> November 2019** ahin khawvel khualzinna hinkhua hi mangzo in a kumtuang gam ding zuan in eila chawlsan ta ahi.

## 'DAMNA AW' PHUNGVUKTUTE :

### PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Nk. Lalsangpui, S.Kotlian
6. Upa Laltinkhup, HQ. Church, Tuibuang
7. Pi Manliankim, HQ. Church, Tuibuang
8. Upa D. Mina, Lingsiphai
9. T.Upa Ph. Gena, Lingsiphai
10. Pu. Khamlal Saipum
11. Pu Khamliankap Saipum
12. Pu. Tinklunlal Saipum
- 13, Pu. S.Kapbawi New Delhi
14. Upa Genhau Central Church, Compound veng
15. Pu. Khailianbawi Central Church, Compound veng
16. Pi Kimtawi Kohima

### MEMORIAL GIFT :

1. Pi Deem Melody, **Central Church, (Rengkai)**  
*[in loving memory of (L) Upa Lamthianlal]*
2. Pi Rebekah **Kangvai**  
*[In loving memory of (L) Pastor Khaivung]*
3. Upa Liansomthang **Lingsiphai**  
*[In loving memory of (L) Pu. Henzagen]*
4. Pi. Nem Grace Boisi Capvung **Delhi**  
*[In loving memory of (L) Pi Vanlalchhuangi]*

### SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Rev. S.T.Kaia Vaiphei Nghathal

12. T.Upa K.K.Siam	Tangmual
13. Pi Chinneilun	Tangmual
14. Upa Khaineilal	Leilon
15. Pu S.T. Lemthang	L. Mission Veng
16. Upa Thangpu Changsan	Leimakhong(Happy Valley)
17. Pu Kham songoulian	Kohima

**ENCOURAGERS :**

1. Pu P. Kamneilian,	Lingsiphai
2. Evan Thianlam	Lingsiphai
3. Pi Dampui,	Lingsiphai
4. Upa K.Thanga,	Kangvai
5. Upa Manglem,	Kangvai
6. Upa S.Bela Capvung,	Kangvai
7. T.Upa D. David,	HQ Church, Tuibuang
8. T.Upa Khupneu,	HQ Church, Tuibuang
8. T.Upa Zamthamuan	HQ Church, Tuibuang
10. Pu Lamthianlun,	Central Church, Compound Veng,
11. Pu Vendam,	Central Church, Compound Veng,
12. Pu Haudal,	Nghathal
13. Pu Khamlian khual,	Nghathal
14. Pi Mary Vaiphei,	Nghahal
15. Upa Paukholam	Nghathal
16. Pu Tongzahem	Nghathal
17. Pi. Nunmawi	Ngahthal
18. Pi. Kimbawi	Nghathal
19. Pu Kaikham	Saipum
20. Pu Pauthianlal @ Mengpu,	Saipum
21. Upa Ginneithang,	Saipum
22. Pu Donggen	Saipum
23. T.Upa. Lallawmthang	Saipum
24. Pu. Damthang	Saipum
25. T.Upa Ginlun	Saipum
26. Pu Kaipau	Saipum
27. Pu. Khamthianlun	Saipum
28. Upa. Kaijuanthang	Tangmual
30. Rev. Haulalven	Tangmual
31. Pu Gomang	Tangmual
32. Pu Kamneilal	Tangmual
33. Pu Kaisawmlal	Tangmual
34. Pu Thangneilun	Tangmual
35. Pu. K.Minlian	Tangmual
36. Pu. Khamlallawm	Tangmual

37. Pu Thangthianmang	Tangmual
38. Pi. Niangphal	Bisanmual
39. Upa Nehneithang	Leilon
40. Upa Khupmang	Leilon
41. Pi Hawiniang	Leilon
42. Upa Tongneilal	Leilon
43. Upa Thangmang	L. Champhai
44. Upa Ph. Kamlam	L. Champhai
45. Upa S.T.Siama	L. Mission Veng
46. Pu Seidam	L. Mission Veng
47. Pu Hentinmang	L. Mission Veng
48. Pu Malzawl	L. Mission Veng
49. Pu L.K. Vaiphei	L. Mission Veng
50. Pu Lemlian	L. Mission Veng
51. Pu Hausang	Shillong
52. T.Upa Lallianthang	Salem(Tipaimuk Road)
53. Pastor Kaiminlian	L.Saronphai

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
- (ii). Supporting member- Kum 2(two) a ding in ₹. 2,000/-
- (iii). Memorial Gift- Kum 2(two) a ding in ₹. 2,000/-
- (iv). Encourager- Kum 1(one) a ding in ₹. 1,000/-

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, CCpur**

**CIF nos: 86412486695**

**IFSC nos: SBINOO06182.**

--o0o--